



Nuuk 7. januar 2015

Inatsisartut Suleriaasianni § 37 naapertorlugu Naalakkersuisunut imaattunik apeqquteqarpunga.

### Apeqqutit

- Naalakkersuisut 18. december whistleblowerimut aqqissuussinissaq pillugu tusarniuteqarput. Taakkulu Namminersorlutik Oqartussani maleruagassatut atuuttussaallutik. Naalakkersuisut taamatut iliornermikkut isumaqarpat Inatsisartut 2013-imi ukiakkut ataatsimiinnerminni whistleblower pillugu (imm. 86) akuerisaannut naapertuuttumik iliorlutik?
- Qinigaaffik nutaaq pineqaraluartoq taamaattoq whistleblowerimik aqqissuussineq pillugu 2013-imi ukiakkut ataatsimiinnermi siunnersuutigineqartup (immikkoortup 86-ip) oqaasertai Naalakkersuisut nammassinialersaarpat?
- Whistleblowerimik aqqissuussinermik eqqussinissamut piuminaallisitsisunik imaluunniit kinaassutsimik isertuussinissamut ajornarsisitsisunik inatsisunik malittarisassanillu Naalakkersuisut paasisaqarpat? Taamaappat inatsisit malittarisassallu tamakku Naalakkersuisut allanngortilersaarpat?
- Suna pissutaava oqartussaasut avataaneersut pinnagit Naalakkersuisut siunniummassuk Naalakkersuisut Kukkunersuisoqarfiata whistleblowerit saaffiginnisutaannik tiguisartussaananeramik aqqissuussineq atorneqassasoq? Suna pillugu oqartussaasut avataaneersut atorumaneqarsimangillat?
- Allassimavoq whistleblowerip kinaassutsiminik isertuusserusunnera Naalakkersuisut Kukkunersuisoqarfiata ataqqissassagaa, "tamanna tamakkununga tunngasuni inatsisitigut malittarisassanit atuuttunit allaanerungippat" (siunnersuummi § 2, imm. 2). Naalakkersuisut paasinninnerat imaannerpa, inatsisit atuuttut innersuussutigalugit, whistleblowerip kinaassusianik isertuussinissaq ajornakusoorajuttariaqartassasoq?
- Siunnersuutip Namminersorlutik Oqartussat tusarniaanernut nittartagaannut ilineqarsimanginneranut suna pissutaava? Naalakkersuisut paasinninnerat imaannerpa siunnersuut Naalakkersuisut toqqartumik tusarniaaffigisaasa saniatigut allanut attuumassuteqanngitsoq?

(Inatsisartunut ilaasortaq Naaja H. Nathanielsen, Inuit Ataqatigiit)

### Tungavilersuut

2013-imi ukiakkut ataatsimiinnermi siunnersuuteqarpunga pisortat namminersortullu suliffiutaanni whistleblowerimik aqqissuussinermik eqqussinissamut sunik akimmiffiusinnaasunik pīaanissamik imaqartumik. Siunnersuut Inatsisartunit taparserneqarpoq. Siunnersuulli saqqummiuteqqittariaqarpara qinersineq sioqqullugu piviusunngortinneqanngitsoormat. Tassunga atatillugu paasiniarsarisimavara sammisamut tassunga tunngatillugu Naalakkersuisut qanoq isumaqarnersut.

Naalakkersuisut politikikkut anguniagaat naalakkersuisooqatigiinnissamik isumaqatigiissummi allaatigineqarput. Naalakkersuisooqatigiit taanikuuat kalaallisut oqaasertai atuut-

tuusut. Tamanna pingaaruteqarpoq pissutigalugu danskisut kalaallisullu oqaasertaliugaaneri assigiinngimmata.

Naalakkersuisooqatigiit ilaatigut ima allapput: "Pisortat ingerlatsiviini pissaanermik atonerluisoqartanninnissaa pillugu inatsisiliortoqassaaq, qinikkanut atorfilinnullu kiisalu pisortat pigisaannut ingerlatseqatigiiffinnut atuuttussamik." (Quppernerit 21-at).

Uannut erseqqinngilaq pissaanermik atonerluineq atorfimmilu peqquserlunneq akerlilersorniarlugit Naalakkersuisooqatigiit suniarpiarnersut. Taamaammat politikkiminnik Naalakkersuisut erseqqissaaqqussavakka.

Ullut suliffiusut qulit qaangiutsinnagit apeqqutit tamarmik akineqassasut maannangaaq qinnutigissavara.